

PENTSIONISTEI AURTEN DIRURIK EZ KENTZEA ESKATU DUTE ALMUNIAK ETA ANGUITAK

Pentsioei buruzko debatearekin hasi da ekitaldi politikoa


Abuztua amaitzear dagoenean, ekitaldi politikoa hasi zuten atzo Espainiako oposizioko alderdiek. Joaquin Almuniak eta Julio Anguitak pentsioak ez ukitzeko eskatu zioten Gobernuari. Iuko krisiari buruz ez zuten, ordea, ezer esan.

Erredakzioa / Donostia

PSOEKO batzorde iraunkorrek lehen bilera egin zuen atzo udako etenaldiaren ostean. Bileraren ostean emandako prentsaurrekoan, Joaquin Almuni PSOEko idazkari nagusiak jakinarazi zuen gaur lege proposamena aurkeztuko duela pentsioei buruz. Horren bidez, inflazioa pentsioak igo diren baino gutxiago bada, pentsionistek ez zaie dirurik deskontatuko. Aurtan, adibidez, litekeena da inflazioa aurreikusitakoa baino sei edo zazpi hamarren txikiagoa izatea eta, hortaz, inflazio aurreikuspenaren arabera igotzen diren pentsioek erosahalmena irabaztea. Gobernuak ez du oraindik argi esan zer egingo duen *soberakin* horrekin, baina hurrengo urteko pentsiotik jaitsiko zaiela iradoki du. Almuniak onartu egin zuen oraingo legearekin legezkoa dela diru hori pentsionistek kentzea, baina ez egiteko eskatu zion Gobernuari. «Zazpi milioi pentsionistek eskubidea dute ekonomia-egoera onaz baliatzeko», esan zuen.

Aurrekontuei buruz, Almuniak eskatu zuen arlo sozialari garrantzi gehiago emateko, eta defentsa gastuak, aldiz, murrizteko. Hala ere, PSOEko idazkariak Aznarren «kamaleonismo politikoa» gaitzetsi zuen, presidentek omenaldia egin baitie azkenaldian Canovas del Castillo politikoa kontserbadoreari eta Max Aub ezkertiarri.

Anguita mutu IUri buruz • Julio Anguita Iuko koordinatzailea, berriaz, PCEren Madrilo egoitzan elkarriketatu zen Gennadi Ziuganovekin, Errusiako alderdi komunistako buruzagiarekin. On-



Aznarrek Santo Domingo de Silosen amaitu ditu oporrak

Jose Maria Aznar Espainiako gobernuburuari ere amaitu zaizkio oporrak, eta gaur bertan itzuliko da Moncloa jauregira. Oporren azken egunean, Aznar Santo Domingo de Silosko (Burgos) beneditarren komentua bisitatu zuen, meza mozarabe bat entzun eta fraileekin hitz egin zuen. Arratsaldean, garai batean oporleku zuen Quintanilla de Onesimora (Valladolid) joan zen, urtero egin ohi duen legez, hango PPko militanteekin afaltzera. Etziko bileran, Aznarrek eta bere ministroek 1998rako aurrekontuen eztabaidari helduko diote.

doren emandako prentsaurrekoan, Anguitak argi eta garbi utzi nahi izan zuen oraindik oporretan dagoela eta horregatik muzin egin zion Iuren barne krisiari buruz hitz egiteari. «Nire ahoa ez da irekiko taldekideek nire balorazioa eta proposamenak entzun arte. Hori irailaren 10eko Iuko lehendakariaren bileran gertatuko da», esan zuen.

Hala ere, Anguitak ez zuen hainbeste traba jarri eguneroko-

tasuna duten beste gai batzuei buruz hitz egiteko. Iuko koordinatzaileak «ustezko gaizkile» deitu zion Jose Augusto de Vega Auzitegi Gorenko epaileari, epaile horrek *Filesa* auziko auto batean Auzitegi Konstituzionaleko epai bat aldatu duelakoan baitago. De Vegak CGPJren eta fiskal nagusiaren parte hartzea eskatu zuen salaketei aurre egiteko.

Anguitak, bestalde, Gobernuaren politika ekonomiko «maltzu-

rra» kritikatu zuen, eta horren fruituak udazkenean ikusten hasiko direla iragarri zuen. Pentsioei buruz, ez du begi onez ikusten pentsionistek inflazio baxuari esker irabazitako erosahalmena kentzea. Horren ordez, Anguitak nahiago du sindikatuek proposatutakoa, hots, *soberakina* pentsio txikiaren onurarako izatea. Anguitak gogoratu zuen jasotzen diren pentsioen % 70 gutxieneko soldata baino txikiagoak direla. X

Ekaitzak kalte handiak eragin ditu Paueko eskualdean

Le Neez erreka gainezka jartzeak ditu sortu galera larrienak Biarnoko erdialdeko herri batzuetan

Allande Sokarros / Baiona

EURI-JASA indartsuek eragindako uholdeak izan ziren astelehen arratsean eta gauean Paueko (Biarno) eskualdean. Kalte handiak izan diren arren, biltzarrik ez da, haatik, izan. Savoia Garaian ere galerak izan ziren denboraleen ondorioz, batik bat Le Grand Bornand herrian.

Paueko hegoaldeko Bosdarros, Bruges, Gan eta Rebenacq Biarnoko herriak ziren larrienik kaltetu, astelehen arratsean hasi eta gau osoan iraun zuten ekaitz bortitzen ondorioz. Bat-bateko euri-jasen ondorioz, Le Neez eta Le Soust errekek gainezka jarri

ziren, eta bazterretako eraikinak urpean harrapatu. Toki batzuetan urek 2,5 eta 3 metro arteko altuera hartu zuten, hala nola Brugesko Le Landistou kanpalekuan. Uhandi lohitsuak hamar bat oihal aterpe eta bi karabana eramane zituen berekin, baina jendeak ihes egiteko denbora izan zuten. Beste hamar bat karabana sokekin lotzeko astia ere izan zuten.

Bosdarros eta Gan herrietako hainbat auzotan, aldiz, etxeak 40 zentimetro urpean hartuak ziren. Bide ugari ere moztuak ziren, uharra erditik igarotzen zen eta. Rebenacq inguruan, turista alemaniarrek zeramatzen autobus

bat urbiziaren erdian harrapatua izan zen eta suhiltzaileek sorotsi behar izan zituzten bidaiariak. Ororen buru, suhiltzaileek 300 ateraldi inguru behar izan zituzten egin astelehen gauean herri-tarrei laguntzeko. Guztira, ehun bat lagun atera behar izan ziren beren etxebizitzetatik.

Le Grand Bornandi oroitzen garratzak dakartzio ekaitzak • Alpeek ere jasan zuten ekaitz bortitza astelehen arratsean, eta bereziki Savoia Garaiak. Le Grand Bornandeko kanpaleku bat egoiliarrez hustu behar izan zen, lokatz handi batek zeharkatu ondoren. Hogeita bat lagun

atera behar izan zituzten lehenbailehen. Euri-jasengatik bi erreka ziren gainezka jarri eta uharrrak zuhaitz eta guzti zeraman. Kanpalekua 40 zentimetro ur eta lohiren pean hartzeaz gain, ez zen beste ezbeharririk izan.

Alabaina, gertaerak oroitzen garratzak ekarri zituen herri-tarren gogora. Izan ere, 1987ko uztailean, ekaitz bortitz baten ondorioz, Le Borne erreka gainezka jarri zen eta ur zein lohi uhar izugarri batek kanpaleku bat bete-betean harrapatu zuen, eta 23 lagun heriotza eragin. Hondamenetik landa, erreka bazter-rrak berrantolatu zituzten eta segurtasun neurriak handitu. X

laburrean

■ Alacanteko enpresari baten gorpua eta hiltzailea aurkitu dituzte

JOSE VILA enpresariaren gorpua atzo goizean aurkitu zuten, Ondara herriko amildegian. Vila hil honen 19an bahitu zuten, Alacanten, eta Poliziak biktimaren adiskide bat, Francisco M., eta beste bi lagun atxilotu ditu, bahiketaz eta hilketaz akusatuta. Antza denez, Francisco M.-k enpresaria hiru tiroz hil zuen bahitu eta egun berean. Ondoren, senideei 45 milioi pezetako erreskatea eskatu zien eta bi laguntzailerik agindu zien dirua jasotzeko. X

■ Jandarmeria bati eraso diote ehun bat lagunek Gard departamenduan

EHUN bat lagunek eraso egin zioten astelehen gauean Aimargueseko (Gard) Jandarmeriari, han atxilotuta zeuden bi herritarren askapena exijitzeko. Eraikineko hainbat beira apurtu eta jandarmen furgoneta bat txikituta geratu zen. Inguruko hirietatik iritsitako jandarmek esku hartzea beharrezkoa izan zen herritarren erasoaldia geldiarazteko. Jandarmerian atxikiak zeuden bi gazteei leporatua zaie bi magrebiarren aurkako erasoan parte hartzea ordu batzuk lehenago. X

■ Korsikan iruzur fiskal handia dela dio txosten batek

KORSIKAN iruzur fiskala oso handia dela salatu du Finantzaketako Azterketa Nagusia (IGF) erakundearen txosten batek. Haren arabera, korsikar ugarik ez dute errenta aitortzen egiten, eta egiten dutenen artean ere iruzur handiak badaude, kontrolen osteko zorrak, batez beste, 18.000 liberara igotzen baitira, eta Frantziako beste herrialdeetan, berriaz, 6.000 liberaren mugatzen. Bestalde, Korsikako ofiziale, dendari edo lantegi jabeen % 40 inguruk ez dute BEZaren deklarazio egiten. X

■ Puignero enpresaria berriaz espetxera lo egitea

BARTZELONAKO Espetxe Zaintzako epaileak bertan behera utzi du Josep Puignero enpresari presoari Generalitateak emandako hirugarren gradua. Horren ondorioz, Puignero Quatre Caminseko espetxean egin beharko du 10 aurrerantzean. Bartzelonako Entzutegiak lau urteko kartzela zigorra ezarri zion Puigneroni, haren ehungintza enpresa batek Ter ibaia zikindu zuelako. Bi hilabeteko zigorra bete zuenean jasotzen hirugarren gradua. X